

Boutiso di "Luho di Speransa" di grande dame Nydia Ecury

WILLEMSTAD - "Luho di speransa" ta título di e di seis kolekshon di poesia ku e grande dame di poesia antiano, Nydia Ecury a publiká.

Djasabra, 15 novèmber, famia i amigunan a bini huntu den Teatro Luna Blou pa selebrá e echo memorabel akí kuné.

Diputado di Kultura, señor Eduardo Cova, pa ken contenido di e kolekshon te na e momentu ei tabata un sorpresa, a anticipá a base di e título kiko e contenido por ta ofresé.

"Speransa ta base di tur adelanto", asina el a musta.

"Pa medio di speransa nos ta kapas na sali spiritualmente for di presente i forma pa nos mes imágen di un futuro nobo, diferente i mihó. Esei ta e luho, karakterístiko di speransa.

Ta personanan manera Nydia Ecury ku pa medio di palabra ku nan ta pisa, puli i pone den un lus nobo, ta duna e sper-

ansa ei forma."

Promé ku esei Bernadette Heiligers a trese na atenshon di presentenan balor di forsa di palabra.

"Palabra ta duna nos 'grip' riba nos eksistensia", asina el a musta.

"Palabra ta hasi posibel pa kristalisá nos pen-

samentunan i kompartinan ku otro. Palabra tin ademas un forsa poderoso di sea forma òf kibra un hende. Pa logra e meta akí tin tur sorto di estilo na disposishon."

Heiligers a referi aki na e lema ku den historia a resultá destruktivo "*Ein*

Volk, Ein Reich, Ein Führer", banda di esun positivo ku a keda wardá "*Liberté, Egalité, Fraternité*" di Revolushon Franses. Un poeta no ta usa palabra komo medio pa trese un idea, sino komo refleho di loke su alma ta sinti.

Si e refleho akí den un poema tin un karakter universal, lo e por ta pa e lektor un konfrontashon pisá. Esei ta kisas e motibu pakiko no ta tur hende tin e kurashi di lesa poesia." asina Bernadette Heiligers a konkluí. El a resumí su eksposishon den e poema '*Krak*' di e kolekshon nobo "*Luho di Speransa*".

For di inisio di e atardi pianista Wim Statius Muller a krea e ambiente kultural ameno tokando piesanan presioso.

El a terminá ku e wals 'Nydia' ku e mes a ko-

mponé i dediká na e poeta. Nydia mes a deklamá i Gibi Bacilio tambe, na su estilo típiko, kompañá pa Rudsel Isidora na tambú.

Pero punto kulminante di e atardi tabata naturalmente boutiso di e kolekshon nobo na enkargo di e tres nietunan di e poeta: Richard, Walter i Matthew. Madrina Lucille Berry-Haseth i padriño Sidney Joubert a para gosa mirando kon e muchanan ku strea den nan wowo a stroistu e kolekshon nobo di poesia di nan wela. Di tal forma nan a representá un imágen asertá i personal di Nydia su *Luho di Speransa*.

Finalmente, den un poema na *midí* madrina Lucille Haseth a ekspresá su speransa ku "lo tin reservá pa Nydia, hopi aña mas di poesia".

